

gittandi, moratusque est in solitudine Pbaran. Deinde duxit & alias uxores de filiis Evæi Chananæi, qui habitabant juxta *montes Gelboë*, non longè à mari Galilææ, ubi mons quidam ab ejus inhabitatione denominatus est *Seir*, quem scilicet tunc possedit, quum Jacob è Mesopotamia rediret: id quod & hinc probari potest, quia quum Jacob timeret occursum fratris sui, occurrerunt illi angeli Dei, ut trepidum cor roborarent, quos appellavit *Mahanaim*, hoc est *castra*, unde & locus ille *Mahanaim* cœpit vocari, Gen. xxxi. 1, 2, 3. constat autem locum illum esse in *monte Galaad*, ^{Mons Galaad.} qui tribui Gad cessit in sortem. Mons itaque *Seir*, qui est in tribu Gad, non longè abest à montibus *Gelboë* atque civitate *Bethsan*, ubi scilicet Jordanis ingreditur mare Galilææ, à quo loco littus Jordanis orientalis est duarum tribuum & dimidiæ usque ad *campestria Moab* sub monte *Abarim*. A quo si ulterius in ejusdem fluvii littore contra Austrum procedas, transibis terram Moab usque ad *Petram deserti*, ^{Petra deserti.} quæ nunc *Krac* dicitur, cui pars quædam *terræ Ammon* succedit, pertingens ad *Mare mortuum*, & hinc usque ad *montem Seir*, qui conjungitur *deserto Pbaran* juxta *Cadesbarne*, habens à latere *desertum Sinai*.

C A P. VI.

Iter ab Acone versus Eurum.

Nunc aliam prosequamur lineam, ab *Acone* scilicet consueto more exordium facientes, & contra *Eurum* iter dirigentes. Igitur si ad hanc plagam gressum moveris, primò occurret *Cana Galilææ*, quatuor distans leucis ab *Acone*. Hinc sunt duæ leucæ versus meridiem ad villam *Ramam* nomine, quæ sita est sub monte, qui *Nazareth* usque pertingit. A Rama est una leuca & dimidia, ad villam quandam, quæ, olim grandis, fuit vocata *Abelina*, distans à *Dotaim* media leuca versus orientem, de qua in libro Judith fit mentio Judith. iii. 13. & Judith. vii. 12. De *Abelina* est una leuca ad *montem Bethulia*, ubi Judith occidit *Holofernem*, qui mons per totam ferè cernitur Galilæam, habens adhuc pulchra quædam ædificia, sed plures ruinas. A *Bethulia* est una leuca ad civitatem *Tyberiadis*, eundo, scilicet, inter Orientem & Austrum supra mare Galilææ, à qua mare Galilææ dictum est *mare Tyberiadis*. Hæc olim vocata est *Cinereth*, & ab ea mare *Cinereth*, sed ab Herode instaurata in honorem Tyberii Cæsaris, *Tyberias* est vocata. Habet solum fertile & pingue, terminaturque ad eam regio *Decapoleos*, de qua Jacobus patriarcha Hierosolymitanus sic ait in libro, quem de *Terra Sancta* composuit: *Regionis Decapoleos fines sunt mare Galilææ ab oriente, & Sidon magna ab occidente, & hæc est latitudo ejus. In longitudine verò incipit à civitate Tyberiadis, & vergit per littus maris Aquilonare usque in Damascum.* Dicitur autem *Decapolis* à decem principalibus ejus civitatibus, quarum nomina sunt hæc, *Tyberias*, *Sephet*, *Cedes Nephtalim*, *Affor*, *Cæsarea Philippi*, *Capernaum*, *Jonitera*, *Bethsaida*, *Corozaim* & *Bethsan*, quæ etiam *Scythopolis* est appellata. A Tyberiade contra Occidentem sunt sex leucæ, & à *Cana Galilææ* tres contra Austrum ad *Sephorum oppidum & castrum*, unde Joachim pater beatæ Virginis oriundus putatur: & est in tribu Aser juxta vallem Carmelon. A *Sephor* sunt tres leucæ contra Austrum ad *Nazareth* civitatem Galilææ, ubi Christus conceptus & educatus fuit. Distat ab *Acone* septem leucis. Extra eam civitatem ad spatium unius stadii est locus, quem appellant *saltum Domini*, ubi Judæi volebant Jesum præcipitare, sed subito elapsus manibus eorum, in latere montis opposito inventus est. Ab isto monte videtur *mons Thabor & Hermon*, *villa Endor*, *Naim* & *Jezraël*, atque ferè tota planicies *campi Esdrelon*. A *Nazareth* duabus leucis versus Orientem est *mons Thabor*, in quo dominus transfiguratus fuit, Matth. xvi. 1, 2. Sunt in eo adhuc ruinæ variæ palatiorum & turrium, quæ hodiè sunt latibula leonum & aliarum bestiarum. In pede Australi hujus montis, contra villam *Endor*, prope viam, quæ ducit à Syria in Ægyptum, est locus, ubi Melchizedec dicitur occurrisse cum pane & vino Abrahæ redeuntri à cæde quatuor regum, Gen. xiv. 18. In pe-